

KALUNGA IKIYE MUKA

KULILUMBUNUNA IVENE



Ove Setu wa Mwilu, Lizu lya kufuma kuli Ove lili na naulumbunwiso kuhambakana vyosena muthu nahase kulinga mokomoko kuhanjika ha kala lwola, mwomwo vathu vali nakuvandamina kukumona Ove. Kaha etu twakusakwilila Ove mwomwo kuli vamwe vali nakutalijiza, vakiko vali nakutala vamone chuma chimwe kusoloka. Kaha omwo vathu vali na lipwila lya chuma chimwe, mwambe kusanyika Mwambe, kuze kwatela kupwa Mwambe watela kukumbulula kukusanyika. Omu mukiko etu tuli hano ufuku uno, mwomwo echi chili hali michima yava kakuzata, na va vathu, kutusanyika hamwe na kuhula uselelwa na jikisu kuli Ove, kufwelela nge Ove nauya na kuhindula vakakuviza na kulwila vanajimbala, kaha muya na kusolola Lizu Lyove.

² Kaha etu twalombo, Setu wa Mwilu, nge Ove uye nakutuhana etu echi omwo tuli na kulikehesa nakuvandamina hali Ove, ufuku naha ufuku. Echa kupwenga chimwe nge—nge kuhingununa cha Shipilitu Wajila, kaha echa muthu hi muthu apwe kapuputa kukala chuma chinavajingilika kusezaho Kalunga. Echa kupwenga chuma chachinene nachitambakana mukachi kavathu, valinapwila ya Kalunga, palanga nomu nakuya na kwiza kuhizumuka kuhita kulifuchi lyosena hano kaha liuka lyosena kupwa lya kuzala na vathu, vakashili kutambakana hali Kalunga avavwile keke, kaha—kaha ou Shipilitu Wajila kuhindula vakakuviza, kulingisa vakakumbilikita kutambuka, kaha kusangula vafu, kaha tuhane evi vyuma vize vashikile mu Lizu Lyove.

³ Twaya, Mwata Yesu, na kuzalisa lushiko Lwove. Twaya kuli etu ufuku uno. Etu twafwelela nge Ove uli youmwe zau, lelo, na haya myaka, nge jishiko Jove kajahonako. Oseni melu na mavu anahase kuhona oloze Lizu Lyove kalyeshi kuhonako. Echa Shipilitu Wajila asokolole kwivwushisa chameso etu. Echa Shipilitu Wajila ezenga na kwala muhanga. Echa kwivwushisa chetu chipwenga chakusokoloka kuli Shipilitu Wajila naku ngolo ja Kalunga ufuku uno, mangana Ikiye ahase kusolola Mazu Eyi ajishiko kuhichila muli etu. Etu twalombo echi Mulijina lya Yesu. Amena.

⁴ Jino, ufuku uno, enu mwatalanga ha echi kutanga, echa tufukunune mu Mbimbiliya ku Mukanda wa Petulu Wamuchivali, na kuputuka ha vase ya 15, kupwa kaha jila yakuhanjika ha Chisoneka mu minyutu yayindende.

Kaha Nanguhakako muchima kukumyanukisa mangana nge ngunalovoka lyehi mumbalaka yino mukahase kuvyanukanga lika.

Mwomwo etu katwakavangijile vyuma vyamokomoko, vishimo, Mwomwo omu twamijimbwile ngolo ja Mwata wetu Yesu Kulishitu na kwiza chenyi katwakavangijile vishimo vyamokomoko vyakutaka vyahakulungulukako, oloze twapwile tuwakaleho twamwene ukelenga wenyi.

⁵ Ngwazanga echi, “*vakaleho.*” Keshi vishimo vimwe. Etu tuvinjiho wa chuma echi etu tuli nakuhanjika ho.

Mwomwo atambwile ulemu na upahu kuli Ise Kalunga, haze lizu lyejile kuli ikiye kufuma kuli ivene upahu wakukomwesa, Ou ikiye Mwanami ngwazanga, Angusulwisa chikuma.

Kaha lizu kana etu twalivwile kufuma mwilu, hakupwa nenyi hapili yajila.

Kaha nawa tuli na lizu lya upolofweto lya kuzama mbe; chakuhambakana enu namulinga kanawa kuwahaka kumichima yenu nge, omu namujika meso halinongo lili nakumunyika . . . mumilima, palanga nomu nakucha, nomu litota mwatutuka mumichima yenu:

Chakavanga mwatela kutachikiza ngwenu, upolofweto wosena uli mu mazu vasoneka ajila kawafuma kukulumbununa chavishinganyeka vya kapolofweto iveneko.

Mwomwo kakweshi upolofweto wamwakawafuma kumuchima wamuthuko: oloze vapolofwetova Kalunga vajila vahanjikile vyakufuma kuli Kalunga muze avahanjikishilenga Shipilitu Wajila.

⁶ Echa Mwata ahake jikisu ku kutanga cha Lizu Lyenyi. Jino, Yami nanguya nakumbata echi kupwa mutwe wachihande: *Kalunga Ikiye Muka Kulilumbununa Ivene.*

⁷ Etu tuli nakuyoyela mulikumbi lya chimbalanganyi. Etu tuli na kuyoyela mulikumbi kana omwo malunga na mapwevo vanahono chikupu na mwakulinga. Vyuma vyosena, china—china soloka kupwa mukuzeneka chiyulo. Vyuma vyosena, kusoloka nge kuli vyavivulu vyakulihandununa haku vitalitya. Uze ikiye Liyavolo, ali nakulinga echi.

⁸ Jino, Kalunga keshi kuhasako kusopesa vathu mwakwoloka, kwoloka, kuvanga kupwenga chipimo chize atela kusopesa nacho vakiko. Kaha Mbimbiliya ngwayo Ikiye mwakaya na kusopesa vathu hali Yesu Kulishitu, kaha Yesu Kulishitu ikiye Lizu. Muli Mukakujila Yowano, kapetulu wakulivanga, Nahanjika ngwenyi:

Kukuputuka Lizu apwilengako, kaha ou Lizu apwilenga na Kalunga, kaha ou Lizu apwilenga Kalunga kukuputuka.

Jino Lizu alilingishile ivene kupwa wamujimba wanyama, nakuzuzuma mukachi ketu, . . .

⁹ Jino, etu vosena lelo tuli kusoloka cha kupwa Chenyi. Muli Kalunga . . . Chakavanga Ikiye kapwile na Kalunga ko, Kalunga, etu keshi tweji kumusanyika Ikiye kaha kupwa “uze Umwe wahaya myaka na myaka.” Ikiye kapwile na Kalunga ko, mwomwo lizu lya kuvuluka (mu Ingilishi) Kalunga kulumbununa “chuma chakulifukula” kaha kakwapwile umwe apwile nakulifukula kuli Ikiye ko. Shikaho Ikiye apwile Umwe Wahaya myaka na myaka, uze—uze Kaselwoke ivene wa mangana osena. Kaha muli ou Kaselwoke wa mangana osena kamwapwile numba atom, molecule, mokomoko chumachimwe, numba kumunyika kumwe, tanganyika, kakweji, chumachimwe. Kalunga, ou twatachikiza kupwa Kalunga, uze Shipilitu wamunene uze apwile Wahaya myaka na myaka (kaputukile ko, numba kukuma), Ikiye apwile ko. Kaha muli Ikiye mwapwile vyuma vimwe: Vize vyuma vimwe vikiko vyeza nakupwa Kalunga, kahajino vize vyuma Vyenyi kupwa Tata, vize vyuma vyenyi kupwa Mwana, vize vyuma kupwa Mulwilo, vize vyuma kupwa Mukakuka. Vyosena vize vyuma vyapwilenga muli Ikiye. Kaha jino Ikiye . . . Vyuma kana vinalivungununanga kufumavene haze vyuma Vyenyi kupwa nakusoloka.

¹⁰ Omwo Ngwalumbununa, *vyuma vyenyi* vyapwile Vyenyi “*vishinganyeka*.” Kaha lize—lize *lizu* “chishinganyeka kuchisolola.” Kahajino chize chapwile mukushinganyeka Chenyi. Kaha omwo Ikiye ngwenyi, “Echa kupwenga,” kaha kuvyapwile. “Echa kupwenga,” kaha kuvyapwile.

¹¹ Kaha jino, anuka, enu Vakakulishitu mwapwile muvishinganyeka Vyenyi shimbu kanda kupwenga kaye. Kaha enu munapu kusoloka cha vishinganyeka Vyenyi. Shimbu kanda kupwenga numbatuhukaye, enu mwapwilenga muli Kulishitu, (amena) muli Kalunga kukuputuka. Echi chikiko chakulingisa ove, jinonyi, kumona, tengeso Yenye. Kaha mukutohwa apwa Kalunga, Ivene, kulitengeka Lyavene kupwa wakulumbunuka mangana apwenga Ikiye vanahase kumukwata, kumumona, na—na vyangocho. Kaha omu mukiko apwa Kalunga, mukutohwa.

¹² Kahajino vathu ngwavo, “Chize kulumbununa . . .” Ngwapwile na kuhanjika hano keshi hanyima chikumako mukuliwana chetu, kaha lunga umwe ahanjikile kuli yami, ikiye ngwenyi, “Ndumbu walunga Branham, ove uli naulumbunwiso wakahenga. Ove kaweshi na kulumbununa Echi mwakwolokako.”

¹³ Jino, etu tunevu . . . Vakiko veji kuya ku Mesondisiti, kaha vakiko ngwavo “Va Mbututishiti vakiko kavalumbununa

mwakwolokako.” Va Mbaputishiti ngwavo, “Va Pendekosita kavejimoko.” Va Pendekosita ngwavo va “Va—va Waninesi kavejimoko.” Va Waninesi ngwavo, “Va Asembuli kavejimoko.” Kaha wosena ngwavo vakwavo kavejimoko.

¹⁴ Kalunga Ikiye Ivene Muka kulilumbununa! Ikiye keshi na kutonda muthu umwe amulumbunuine Ikiye ko. Ikiye eji kulilumbunwina Ikiye Ivene. Hiya muthu uze nahase kulumbununa Kalunga? Kalunga Ikiye Ivene Muka kulilumbununa.

¹⁵ Jino, Petulu kuhanjika hano, etu twawane nge kukuputuka omwo Kalunga ahanjikile, “Echa kupwenga kumunyika,” kaha kwapwile kumunyika, chize chapwile kulumbununa kuli chize. Omwo Kalunga ahanjikile kala chuma kaha chize chasolokele, kahajino chize chapwile kulumbununa nge Lizu Lyenyi lyapwile lya kwoloka. Talenu? Omwo Ikiye ahanjikile, “Echa kupwenga kumunyika,” chize chapwile kushinganyeka chenye chakavanga shimbu kanda kupwenga chize chakufwana nge kumunyika. Omwo Ikiye ahanjikile, “Echa kupwenga kumunyika,” kumunyika chamwashikile muutangatanga, chize chapwile kulumbununa. Naumwe pimb mwahasa kuchilumbununa echi wauchi, mwomwo Kalunga nachihanjika kaha kuchapwile. Omwo nge Kalunga mwahanjika kaha chize nachisoloka, chize chinapu kulumbununa cha Lizu Lyenyi. Mwomwo ika vathu vali nakuhona kumona echi? Ika vathu vanahono kumona echi?

¹⁶ Omwo Kalunga mwashika lushiko kaha Kalunga ngwenyi. . . Mu—mu kuputuka, mu Kuputuka, Ikiye ahanyine Lizu Lyenyi kuchisemunwino kuchisemunwino kufuma kukuputuka na kusongo. Kaha, kuhita muli evi visemunwino, liuka lya kaye likwechi vyuma vyosena evi vya kulifutula na vyisemwa, kaha navyangocho, kaha Kalunga lwola lwosena eji kutumanga halwola, kufuma vene ku Tesitamende Yamwaka kaha Yayihya, tupolofweto! Kaha Lizu lya Mwata lyeji kwizanga kuli kapolofweto. Kaha eji kulinga Echi ngachilihi? Echi cheji kusolola Lizu lya Kalunga. Kusoloka cha Kalunga, chize cheji kwambululanga nge chakwoloka mokomoko chakuhenga. Naumwe pimb nahase kulumbununa Echi, Lizu lyeji kulilumbununa Livene. Kalunga ashikile echi kaha nachisoloka!

¹⁷ Kuwaha muka nachipwaho kulinga kuhanjika chuma cheka hali Echi? Hiya muthu mukashili ou mweseka kuhanjika (nge Kalunga natungu lushiko kaha Kalunga mwachilinga) echi echi kulumbununa chakuhenga? Ou Kalunga Lyavene kulinga Ikiye Ivene kulilumbununa, kulumbununa. Ikiye katonda muthuumwe kumulumbununa Ikiye, Ikiye eji kulumbununa Lyavene ha kusolola vize Ikiye ashikile nge Ikiye mwachilinga.

18 Mamalelo, kachi Liuka nalihasa kumona echi na kumona jishiko eji vahana ku chisemunwino ha chisemunwino! Visemunwino vikwavo vyosena, Kalunga natumu halwola luno (nakuhita na muvisemunwino vya mumauka atanu na avali) kaha ikiye nasolola vyuma vyosena vize Ikiye ashikile kulinga. Vyuma vyosena, kuze kwakweshi chuma chimwe chasalako chakuzeneka kulinga ko. Mukiko vene! Ocho Ikiye ahajikile Ikiye kulinga, chikiko Ikiye mwalinga.

19 Mwomwo nge omwo Kalunga ahanjikile, kunyima kuze ku Yisaya, Ikiye ngwenyi, “Mwana pwevo kanda lyehi alimone lyehi na lunga mwakemita,” kaha ikiye emichile. Jino, Hiya—Hiya nahase kulumbununa echi? Kalunga ikiye na lumbununa. Ikiye ngwenyi, “Mwana pwevo kanda lyehi alimone na lunga mwakemita,” kaha ikiye emichile. Jino, yove hiya...ove kaweshi...Nachuma chakuhanjikaho hali echi, mwomwo Kalunga ngwenyi ikiye mwahasa kaha achilingile. Oloze liuka lyapwile maupuputa waunene kuhasa kumona echi. Talenu, vakiko vapwile nanashinganyeka chavo hali echi. Echi chapwile nawa—nawa chakuhandunuka navize vapwile na kuvandamina.

20 Petulu hano apwile na kutala kunyima, ikiye ngwenyi, “Kalunga asolwele Kulishitu ha Lizu Lyenyi, Ikiye ngwenyi, ‘Ou Ikiye Mwanami walunga ngwazanga.’” Ava vakakufwelela vemanjine kuze. Kaha Kulishitu ikiye Kusoloka cha Kalunga. Ikiye lwola lwosena amusolwelenga Kulishitu na Lizu Lyenyi, Mwomwo Kulishitu ikiye Lizu. Ikiye eji kulisolola lwola lwosena.

21 Omwo Ikiye ahanjikile...Mumakumbi a Nowa, Kulishitu apwile muli Nowa. Enu mwafwelela echi? Nowa ngwenyi, “Nayiya na kunoka vula. Nakuya nakupwa vula, kaha mavu navaya nakuwenyeka.” Kaha kwanokele. Echi kachatondele kulumbununa ko. Yanokele mwomwo Kalunga, muli Nowa, ngwenyi, “Nayiya nakunoka vula.” Ikiye apwile kapolofweto, kaha chinjikizo chapwile nge ikiye ahanjikile kaha chejile nakuhita. Shikaho vakiko kavatela kulumbununa chizeko.

22 Vamwe vavo pamo, kujinguluka, ngwavo, “Ou lunga katachukijile ocho ali nakuhanjikaho.”

23 Oloze Kalunga apwile lwola lwosena na lushiko, “Kachi nakupwa umwe mukachi kenu ali mukashipilitu, mokomoko kapolofweto, kaha ocho ikiye mwahanjika nachiza nakusoloka, kahajino mwivwulilenu.” Echichakwoloka, mwomwo chinapu chamuchano. Chize chatela kupwa nakusungama hamwe na Lizu. Kaha Nowa apwile wakusungama hamwe na Lizu. Omwo ikiye apolofwetele nge nakuya na kunoka vula, kaha yanokele. Echi kachatondele kala kulumbununa ko, mwomwo chazachikile vene.

24 Yisaya ngwenyi, “Mwana pwevo kanda alimone lyehi na lunga mwakemita,” kaha emichile. Jino, chize chapwile chuma

chakukomoka. Mwomwo, talenu, mwahichile myaka handulendi kufuma haze numba uze pwevo kanda lyehi alimone na lunga emite.

²⁵ Chize chapwile cha kukomoka palanga lunga wa mwaza wa lijina lya Yosefwa, uze lunga lyenyi, “kupwa lunga wakwoloka kaha kajinyine kumusawisa kuli kungumbuwa. . .” Uze lunga wa mwaza mumakumbi aze, chapwile ngachilihi na uze Yosefwa hanyima yakuhuhwa, kumbata Maliya.

²⁶ Ikiye apwilewa kuhuhuwa. Mulikumbi lize, kuhokola chize, chapwile chochimwe nge walingi ujila. Kaha, mukiko vene, kuli Yosefwa, chasolokele nge Maliya apwile nakumuzachisa mangana apwenga chiwuva, mokomoko lukepwe lwa kuhenga chenyi, ’mwomwo hano vamuwanyine kupwa hi chisemi, oho kanda vamumbate, shina kumuhuhwa kaha. Kaleyoy kangana, vatela kumwasa malwola na kufwa; chikiko chinahase kupwa, mu jishimbi.

²⁷ Kaha Yosefwa, lunga lyenyi, apwile lunga wakwoloka, lunga wakwoloka vene. Ikiye amufwelelele Kalunga. Kaha omwo ikiye atalile hali ikiye na aze, meso azangi amanene amavovu, kaha ngwenyi, “Yosefwa, Kangelo wakulitula Gabriel ezanga kuli yami kaha nangulweke yami nge Nanguya na kwimita, chakuhona kulimona na lunga.”

²⁸ Jino, kachi Yosefwa atalile hanyima mu Chisoneka, uze kapolofweto ngwenyi ikiye mwalinga muze! Echi chapwile kaha Kalunga kulumbununa Ivene Lizu Lyenyi! Talenu? Oloze chize chapwile chakukomwesa chikuma.

²⁹ Ou ukiko ukalu mukala chisemunuino. Eli Lizu lya Kalunga lyapwa lya ungeji kuli vathu; Lili vene chikomwesa. Kalunga lwola lwosena alinga mwa chikomwesa. Chili chikomwesa kwosena ali Kalunga. Echi chili chakulimbalaka na zachiso yakaye, mwomwo vakiko vakwechi vyuma na jila vakiko vanashinganyeka mwatela kupwa. Oloze Kalunga eji kwizangamo na kulinga chikomwesa.

³⁰ “Kaha nachipwa ngachilihi ou pwevo kanda alimone na lunga emite?” Ikiye apwile wakushishika, ikiye ahulile Kalunga hali echi.

³¹ Kaha jino Kalunga ahanjikile kuli ikiye muchilota, kaha ngwenyi, “Yosefwa, ove mwana Ndavichi, kanda kwivwa woma kumbata Maliya kupwa pwevo lyove ko, mwomwo chize nemita muli ikiye chinapu cha Shipilitu Wajila. Kalunga na mufwiki ikiye. Chikiko chinalingi muze.”

³² Enu munamono omwo Kalunga alingile na Yosefwa kuze? Mujila yamuchivali, mujila ya chilota. Jino, etu tunatachikiza kwatama vilota, etu twafwelela muvilota. Ngwafwelela muvilota. Kupwa. . . Kalunga lwola lwosena azachilenga na vathu muvilota. Oloze vilota yapwa jila yamuchivali, talenu, chinahase kupwa chakwoloka mokomoko chakuhenga

kuvangila vanachilumbununa. Oloze ikiye katondele kala kulumbununako. Apwile Kalunga Ivene kuhanjika kuli Yosefwa, mwomwo kakwapwile kapolofweto ko mulifuchi mumakumbi aze atela kulumbununa. Kavapwile na kapolofweto ko mummyaka fwoo handulendi. Shikoho chuma chamwaza, nge Kalunga azakaminyine chiyoyelo, chiyoyelo cha Mwana Neyi Ivene, ahanjikle kuli Yosefwa kuhichila mu chilota chakuzeneka kulumbununa. Ikiye ngwenyi, “Uze pwevo noloka. Chize chinapu Chuma cha Shipilitu chize nemita muli ikiye ali Mwana walunga wa Kalunga.” Kachatondele kulumbununa ko.

³³ Kalunga Ikiye eji kulilumbununa Lyavene kuli vamuchano, na michima ya kushishika. Malunga na mapwevo vase veji kutalanga hali—hali chize chili chakuswamana, kachi ove uli wamuchano na kushishika na kufwelela, Kalunga atwama na jila ya kulumbununa echi kuli ove. Chakavanga, wana nge hi lushiko. Kachi nge Yosefwa ayile kaha na kufuma muvisemwa na kuya mu Mbimbiliya, na kuwana, Yisaya ngwenyi ikiye mwaya nakuchilinga chize.

³⁴ Kaha chize chuma vahanjikile, na kusemuka Chenyi, na vyosena hali ikiye vahanjikile kuli Visoneka, “kuli vapolofweto vajila,” nge omu ahanjikile Petulu. Kaha naumwe muthu ali na lisesa lya kuhakako kulumbununa chakupenge kuli echi. Echi chili kaha vene omwo ahanjikile Kalunga omwo nachiya nakusoloka. Ikiye apwile kusoloka cha Lizu lya Kalunga lya kushika muli lize likumbi. Kalunga ahanjikile chize, shikaho chapwileko. Kaha mukiko chapwile.

³⁵ Yesu ngwenyi. . . Omwo Ikiye apwile hamavu, omwo vakiko vahonene kwivushisa mulimo Wenyi, wapwile waunene, chakuhomwesa, (vakiko kavahashileko), chakuhomwesa, mukikovene. Vakiko kavahashile kumwivushisa Ikiye ko. Ikiye ngwenyi, “Tondenu mu Visoneka!” (Ngwafwelela Yami kangweshi nakumijika matwitwi mangana muhone kwivwa, nakutotokela muli echi.) “Tondenu mu Visoneka, mwomwo Mujikiko enu munashinganyeka nge muli na Kuyoya Chahaya myaka, kaha Jikiko jili na kwambulula Yami.” Talenu? “Jikiko Jimwe jila nakumulweka enu Yami Hiya.”

³⁶ Talenu, Kalunga ahanyine Lizu. Likumbi lize kupwa kusoloka cha Kalunga, Kalunga (Emanuwele) nayetu, “Lijina Lyenyi navakamuvuluka ngwavo Wakukomwesa, Wakulweza pungu, Mwangana wakuunda, Kalunga wa Undume, Sevo ya Myaka yosena. Kaha Lijina Lyenyi navakamuvukukanga ngwavo *Emanuwele*, ‘Kalunga nayetu.’” Kalunga apwile muli Ndavichi. Kalunga apwile muli Mose. Kalunga! Uze Kalunga mujila yosena, kulisolola Lyavene muli chize chisemunuino. Oloze chino chisemunuino, “Pwevo kanda alimone na lunga mwakemita na kuneha mwana Walunga, kaha Ikiye mwakapwa Kalunga nayetu.”

³⁷ Echi chikiko vamusukikilile Ikiye, kulilingisa Ivene kupwa Kalunga, kaha nawa hakuhokola Sambata. Ikiye apwile—Ikiye apwile Kalunga wa Sambata, kaha Ikiye apwile Kalunga. Kaha Ikiye kapwile muthu Kaha ko mokomoko kapolofweto kaha ko (oloze Ikiye apwile nge Muthu kaha na Kapolofweto), oloze Ikiye apwile Kalunga Kapolofweto. Kaha Ikiye apwile kuzalishiwa cha Lizu, muzevene Kalunga ambile Ikiye mwakaya nakulinga. Ngwenyi, “Hiya umwe muli enu mwangupayisa Yami ha shili? Tondenu mu Visoneka! Mu Jikiko enu munashinganyeka kupwa naKuyoya Chahaya myaka, kaha Jikiko jili na kukwambulula Yami.” Oloze visemwa vyavo, vakiko vapwile na kuyoyela mumutelezeji wa chisemunuino chikwavo.

³⁸ Nge omu Ngwapwanga na kunangula milungu yayindende hanyima, “*Kuyoyela mu mutelezeji.*” Mutelezeji wapwa “ize engenguu,” musana kulimunyika uvene, kaha uli wamakuli. Kaha kala mutelezeji wa chisemunuino chikwavo unapu kumunyika chamakuli. Vathu lwola lwosena vali nakutambuka muchuma chimwe chize chasolokele kumyaka yakunyima. Va Luteleni vali nakutambuka mu mutelezeji wa Luteleni. Kumunyika cha Luther chapwile chamwaza muli lize likumbi; Wesley apwile wamwaza mulikumbi lyenyi; va Pendekosita vapwile va mwaza mulikumbi lyenyi. Etu tuli nakuya handalo, etu tuli nakuyoyela muchisemunuino chikwavo! Etu natuya lika, lika, etu katweshi kutwalilaho kutala kunyima ko.

³⁹ Omwo etu natuya nakuunda muvyuma kana, etu twashinganyeka echi chinatungika, etu natumbata visemwa vyetu kuvikupilika; kaha echi chili chakwoloka cha likumbi lize, oloze etu tuli nakuya lika! Tondenu mu Visoneka na kumona vika vashika muli lize likumbi, kahajino etu natuya nakutachikiza oho tuli, kahajino etu na twambulula oho tunemanyina.

⁴⁰ Luther; enu munahase kutala mu Chisoneka na kumona nge—nge chisemunuino cha Salute, enu munahase kumona vene kanawa ovyo vashikile. Tala muyachi uka wa kavalu uze alovokele na kuya, tala chalovokele na kuya nakuli wana neyi, mukiko vene, “kulunguluka cha muthu,” kutungulula. Tala Wesley, na vyangocho. Nge omu chejile nakushikumuka na kuchisemunuino cha Pendekosita, ka kushikumuka na muli chize chisemunuino, tala omwo chendele. Tala mu Visoneka na kumona etu tuli hali. Ou ukiko mulonga Yesu ngwenyi, “Tondenu mu Visoneka!”

⁴¹ Talenu etu tuli hali! Ngwafwelela etu Kwiza cha Mwana Kalunga hano vene. Ngwafwelela etu tuli muchisemunuino cha—cha luno lwola luze Ikiye mwahasa kusoloka ha kala lwola. Ngwafwelela Visoneka vinajimbula ngocho, nge etu mu jiola jamakumishilo ja mujimbu ya kaye. Nguli nakumona vyuma nge omu vili nakutungika. Talenu eyi Kasulu ya Ecumenical kutwaminyina mauka osena muchikiko, kutwala mulusona lwa chisuma. Kaha talenu na Wangana wa Loma na

omu ulinakuzachiwa, kaha na vakiko vosena. Talenu vakiko vali nakupwa hamwe, kusoka Kumunyika, kusoka Mujimbu wamwaza. Muthu wosena atela kupandama kuli chizena kutambuka mukunyika chavo mokomoko kaweshi kwendako. Talenu, etu tuli kulwola lwa makumishilo. Kwakwechi chuma chimwe chasaleko oloze kuli etu shina kukwachilila kuli Kalunga na kufwelela Lizu Lyenyi. Eli Lizu lyapwa lwola lwosena lya kwoloka.

⁴² Mu chisemunuino cha liuka lya Lauchiseya, chize chapwile chikiko kaha chisemunuino chaliuka, haviseminuino vikwavo, muze Kulishitu apwile vanamuhake kusali ya liuka. Ikiye apwile kusali, na kungongomweza. Chika chasolokele? Kasulu ya Ecumenical yapwile nakuya na kuhanga Ikiye na kumulovola. Eyi Mbimbiliya ngwayo Ikiye apwile nakupwa kuweluka, kaha mukiko ali. Yikiko yamisokela kuweluka? Eli Lizu. Kaha Ikiye apwa Lizu, Ikiye napunga lika Lizu, kaha hanga ali Lizu naufuku uno! Ikiye ali Lizu.

⁴³ Eyi Mbimbiliya ngwayo, “Eli Lizu lya vambuka, lya ngolo chikuma kuhambakana poko yauvela kuvali,” Hepelewu, kapetulu 4, “mukakutumbununa vishinganyeka na kujindama cha muchima.” Eli Lizu Lyapwile! Vakiko vatelele kutachikiza Ikiye apwile hiya omwo Yesu ahanjikile ngana mukulimbi lize.

⁴⁴ Tala omwo Ikiye alingile. Likumbi limwe Ikiye emanyine haze, maputukilo atete a mulimo Wenyi. Kuze kwapwile muthuumwe ejile kuli Ikiye, wa Lijina lya Shimona, Shimona Petulu. Kaha omwo Petulu atalile hali ikiye kaha—kaha amumwene Ikiye, Yesu ahanjikile kuli ikiye, “Lijina lyove yove Shimona kaha ove wapwa mwana Yona.” (Ikiye atachikijile omwo ahanjikile Mose, “Ou Yehova Kalunga kenu mwakamikatwila Kapolofweto wakufwana nge yami, kaha mukamwiwvulila Ikiye.”) Kaha uze Lunga you nemana aha kanda lyehi amumone Ikiye chiyoyelo chenyi, ngwenyi, “Lijina lyove yove Shimona kaha wapwa mwana Yona.” Mwomwoika, ikiye atachikijile haze vene nge keshi kuhasa kupwa wekako. . . Vakiko kavapwile na kapolofweto ha myaka handulendi, kaha hano uze Lunga you kumulweka ikiye hiya. Shikangaho ahashile kuchitambula echi.

⁴⁵ Fwilipu, ha lwola luze, ayile na—na kuwana Natene mwishi ya mutondo, kaha amunehela kuli Yesu. Yesu ngwenyi “Talenu ka Isalele wakuhona makuli muli ikiye.”

Ikiye ngwenyi, “Lapi, wangwijivile kulihi yami?”

⁴⁶ Ikiye ngwenyi, “Shimbu kanda Fwilipu akusanyike ove, muze wapwanga mwishi ya mutondo, Ngwakumonanga.”

⁴⁷ Ikiye ngwenyi, “Lapi, Ove yove Mwana Kalunga! Ove uli Mwangana wa va Isalele.” Ikiye atachikiile! Ika? Echi kachatondekele kulumbununa ko, Yehova nahanjika echi!

48 Emanyine haze na vase vazenekele kufwelela. Vakiko ngwavo, “Ou lunga apwa Mukulwane wa va ndemone. Ikiye ali—Ikiye ali nakafuta Ikiye nalinakukokela. Ikiye—Ikiye mukavisava, mokomoko chumachimwe.”

49 Yesu atalile hali vakiko, kaha ngwenyi, “Mwomwoika, nge enu namuhanjika echi hali Mwana muthu, navaya nakukukonekela. Oloze omwo Shipilitu Wajila mwakeza na kulinga chuma chochimwe, kuhanjika chachipi hali Chize, kaveshi nakuya na kuchikonekelacho ove, muli kano kaye mokomoko mukaye kali nakwiza ho.” Ikiye apwile nakupolofweta mulikumbi lyetu, likumbi eli tuli nakukumona. Mwomwo Ikiye apwa youmwe zau, na lelo, nahaya myaka.

Anuka, apwile Yesu Kulishitu uze apwile muli Mose.

50 Uze apwile Yesu Kulishitu muli Ndavichi. Omwo Ndavichi, mwana...Ndavichi ayile kupili, nge mwangana wakupungu, kaha alilile hali Yelusalema, chize kachapwile chuma chekako shina Kulishitu muli ikiye. Mwomwo mwahichile myaka eyite handulendi kufuma haze, Mwana Ndavichi apwile natwame Hapili ya Milive na kutala mwishi mu Yelusalema na kulila, kaha ngwenyi, “Yelusalema, Yelusalema, omwo Ngwazanga kachi kukufwika ove nge kasumbi mwautamina, oloze ove kawahashileko!”

51 Omwo Yosefwa apwile mukamenga, uze apwile Yesu. Omwo vamulanjishile mwomwo ya kuwaha na jisiliva ja seti, uze apwile Yesu. Omwo ikiye apwile vamulingishile kupwa muthu wa Potiphar, uze apwile Yesu. Omwo ikiye atwamine kulivoko lya chilyo lya Fwalo. Kaha omwo ikiye mwakatuka, vosena... ndolombita kwimba, kaha kala muthu atela kufukama mambuli, uze apwile Yesu. Naumwe muthu ahashile kwiza kuli Fwalo kuvangila kuhichila—kuhichila muli Yosefwa; naumwe muthu mwaza kuli Kalunga, kuvangila ha Yesu. Uze apwile Yesu, uze Lizu vapolofwetele kupwa lya kuzalishiwa, lyahanjikile mumivimbimbi na vyakufwanyisako.

52 Omwo Yesu apwile hano hamavu, Ikiye alingile chuma chochimwe navaze tupolofweto valingile, mukiko vakiko vatachikijile Ikiye kupwa kusoloka cha Kalunga ha Lizu Lyenyi. Chize kachatondele kuvanga vachilumbununeko.

53 Omwo Natene amwene echi, ikiye aholokele hamavu, ngwenyi, “Ove yove Mwangana wa va Isalele, uze Mwana Kalunga, Mwangana wa va Isalele. Etu tunakutachikiza Ove, naumwe muthu mwahasa kulinga echi wauchi.”

54 Yikotemu ejile na ufuku, ngwenyi mwomumwe nge va Fwaliseu. Oloze, mwamono, vakiko vapwile vakulova chikuma ku Kasulu ya Ecumenical kavahashile numba vakiko kuchitavilako Chize. Ikiye ajimbwile kuli vakiko ngwenyi, ngwenyi, “Lapi, Etu...” Hiya “etu”? Kasulu yavo! “etu tunatachikiza nge Ove wapwa umulongeshi wa kufuma kuli

Kalunga, 'mwomwo muthu na umwe pimbi mwahasa kulinga evi kuvanga Kalunga ali na Ikiye." Vakiko vanatachikiza Echi, vakiko vatachikiza Echi omwo chapwile, oloze vakiko vapwile vakulova muli chize.

⁵⁵ Kaha Kalunga, mummyaka fwote kunyima, nayikisa lino lifuchi na lujimiko lwa Shipilitu Wajila, kaha malunga na mapwevo vali kusali ya Echi mwomwo vakiko vapwile vakulova muchuma chochimwe, kuyoyela mu mutelezeji wa likumbi likwavo. Ukalu uli hali? Wosena natondo kupwa ka Mesondisiti, Mbaputishiti, Pulishiteliyani, Luteleni, mokomoko chuma chimwe. Talenu, uli mutelezeji.

⁵⁶ Vakiko vapwile nakuyoyela mu mutelezeji wa mulikumbi lya Mose. Ikiye ahanjikile ika? Ikiye ngwenyi. . . Vakiko ngwavo, "Etu tutumbaji va Mose."

⁵⁷ Ikiye ngwenyi, "Kachi enu mwamutachikizanga Mose, kachi enu munangutachikiza Yami. Mose asonekele Yami!"

⁵⁸ Kachi enu mwamutachikizanga Luther, enu kachi munatachikiza chino chisemunuino! Kachi mwatachikizanga Mesondisiti, enu kachi munatachikiza chino chisemunuino! Mwomwo Kulishitu asonekele chino chisemunuino! Awa Mazu ali nakuzalishiwa atela kupwa akuzalishiwa muli chino chisemunuino. Echi kacheshi na kutondewa muthu umwe kuwalumbununa Ko, Kalunga Ikiye eji kulilumbununa Ivane. Kalunga eji Kulilumbununa Ivane, mwomwo Ikiye Umwe kaha nahase kulumbununa Echi. Kalunga jishiko jenyi lwola lwosena eji kwinjikiza ovyo Ikiye ahanjikile, kaha echi chikiko kulilumbununa.

⁵⁹ Jino, Yesu, (kulamako lwola), Yesu ngwenyi, muli Mukakujila Yowano, kapetulu 14, vase 12, "Ou mwafwelela hali Yami, milimo eyi Ngulinakuzata navakayizata navakiko nawa." Ikiye Kahanjikile ngochoko? Echi chakwoloka. Echi kachatonda kala kulumbununa ko. Nge muthuumwe mwazata mulimo, unapu waKalunga. Punduvene!

⁶⁰ Ikiye nawa ahanjikile muze, "Nge omu chapwile mumakumbi a Lote, mukiko nachikapwa na hakwiza cha Mwana muthu." Yesu ngwenyi chize. Kumana Ikiye ahanjikile echi? Punduvene, Ikiye ahanjikile echi! Chize kachatondekele kulumbununa ko.

Vakiko ngwavo, "Chamwaza, chize chalumbunuka . . ."

⁶¹ Echi chalumbunukila vene nge Ikiye ngwenyi! "Nge omu chapwile mumakumbi a Lote, shikaho mukiko nachikapwa na kwiza cha Mwana muthu." Mwomwoika makumbia Lote? Echa tuyenu kunyima ha lwola lwalindende, wana vika vakiko vapwile na kulinga.

⁶² Kuze kwapwile mazavu avathu atatu mumakumbi a Lote: vakakufwelela, vakakulifwanyisa kufwelela, na mukakuzeneka

kufwelela. Chapwaka ngocho mumazavu osena, chuma chochimwe.

Etu twawane nge vaka Satome vapwile vakakuzeneka kufwelela.

Lote apwile mukakulifwanyisa kufwelela.

⁶³ Apalahama apwile mukakufwelela. Ikiye uze apwile nachivwasanano chakwinjikiza. Ikiye apwile na kotalijiza mwana walushiko walunga. Ikiye apwile na kuvandamina Chize. Amena. (Kangweshi kuhanjika “amena amena” kuli yami lyaveneko. Mwomwo *Amena* chalumbunukila nge “Chipwenga ngocho!”) Kaha echi cha kwoloka. Apalahama kapwile mu Satome ko. Apalahama apwile kweka kaha kuweluka wa Satome. Ikiye nemanyinako Liuka lya kushipilitu lelo.

⁶⁴ Lote apwa wa kwimanyinako liuka lya chikungulwilo muze mu Satome. Tala, Mbimbiliya yahanjika ngocho, “Jize Jishili yamu Satome jayanjishilenga mwono wenyi wakwoloka hakumbi hakumbi.” Mwomwoika ikiye ahonene kupwa wakuhamuka nakukana chize? Kuvali vavavulu vathu vamwaza vanatwame muliuka lelo, valinakutala na kumona mapwevo na jiputula vanavwale na malunga kulinga vyuma kana, kaha va membala javo vali nakuya, nakuhema ngofu ha Chalumingo, na viwanyino vyakuhema, na kusana na vyuma vimwe, kuhona kwiza kuliuka. Kutwama hembo hafuku Wamuchitatu, nakutala muchisaji cha mivwimbimbi, kuhona kwiza kuliuka. Vakiko vapwile nakwivwa nge kuhanjika chuma chimwe hali echi, oloze lizavu lya vakulwane navavahanga. Ukalu uli hali? Ou Lote cheka, kotalila mujanena na kumona shili, kaha apwile na woma wakuyivuluka shili “shili”!

⁶⁵ Apalahama kapwile mumajilo avoko, ikiye apwile kuweluka wa vize. Ikiye apwile umwe wakwimanyinako Liuka lya mushipilitu. Jino tala omwo chasolokele kulwola lwamakumishilo, hanyima ya kuholoka kakahya. Kaha vosena vase Vakamiyachi yeka nayeka. Chize chinapu muvwimbimbi wa kakahya kuholoka hali va kamiyachi yeka na yeka mukaye lelo, omwo mawangana nawaya nakuwahokola na kuwocha. “Melu nawaya nakuwema,” mwanambe Mwata, “kaha vakiko navawema na kakahya kakanene.” Uze wapwile muvwimbimbi wa echi.

⁶⁶ Jino echa tuhite muli vakiko. Hano Apalahama nalovoka lyehi, keshi mu Satome ko, ikiye alovokele mu Satome. Lote apwile lika mu Satome.

⁶⁷ Chuma chaungeji, chimene chimwe chizuma, kwiji ola jakuma leveni koloko pamwe nge ngocho, ikiye amwene malunga vatathu vali na kwiza, malunga nge omu vapwa vosena, kutambuka na kuhita mujila, mwakuhichila. Apalahama apwile natwame mwishi ya mutelevinde, nakulinokela ivene. Ikiye afumineho, pamo kulisa utanga chimene chize, kaha neza,

kafwe pamo hamusana. Kaha ikiye amwene malunga vatatu vali nakwiza. Kaha kwapwile chuma chimwe na vaze malunga, vaze, vembile ngezo. Mamalelo, yami!

⁶⁸ Kwatwama lwola lwosena chuma chimwe na Kalunga, nge Echi nachiza hali vathu, Chechi kwimbanga ngezo. Vakiko vatachikiza Chize. Kwatwama chumachimwe cheji kuvalwekanga vakiko, kuze kwatwama kwinjikiza.

⁶⁹ Apalahama alahile washi washi, kaha ngwenyi, “Mwata Wami, twaya kaha echa yami ngumihane tumeya twatundende, ngumitondele na kusanyisa mahinji Ove, kaha ngukuhane Ove kachihanda kambolo, kaha jino Ove unyenganga, mujila Yove.” Shikaho Ikiye alumukile kusali. Ikiye alahile mulimba na kumbata mwana ngombe na kumujiha, kaha amuhanyine ndungo na kumuwahisa. Ayile mumambalaka, yapwile kuli ikiye, na kumulweka Sala awahise unga watiliku, nakutunga jimwe, mokomoko unga umwe, nakutunga mbolo, na kupanga jimbolo hakutungila. Ajinehele nakuvahanajo. Shimbu vakiko vapwile vanatwame kuze, nakulya, vakiko vaputukile kutalisa, ou atwalileho kutala kutwala ku Satome. Kaha Ikiye ngwenyi. . .

⁷⁰ Vavali vavo, anuka, vayile ku Satome. Va vali vayile ku Satome. Mwane kanda kujimbalisa echi ko. Yami nguli nakwinyika kuze ahanjikile Yesu ngwenyi. Va vali vayile ku Satome na kulovola Lote na vaze valizangile kulovoka muze. Kaha vaze vavali vashikumikile nakuya kuze, vayile kaha vanangwile. (Kaha kuze kwapwile Umwe atwamine na Apalahama. Tala chinjikizo Ikiye alingile.) Vakiko vatambwile chinjikizo kuze, kaha chapwile. . .vaka Satome vavashile upuputa. Vanangwile Mujimbu wakuhaka upuputa hali vakakuzeneka kufwelela. Kaha Tachikiza chuma muka chazachikile.

⁷¹ Jino, kuli umwe nemana hanyima kaha nakulinga chinjikizo kumeso Apalahama.

⁷² Jino, enu mwatachikiza? Kala mukakutala vyakunyima, kavangiza Visoneka, kavangiza mujimbu wakunyima, kuze kanda lyehi kupwenga lwola lumwe muvisemunuino vya mauka kuze kwapwile muthu ayile mumauka achisemwa amukaye, muze muvikingulwilo, kuze kakwapwile lyehi muthu apwile na lijina lya kukumisa nge Apalahama, a-m-a, shimbu. Oloze lelo vakwechi umwe, G-r-a-h-a-m. Echi chakwoloka. Kuya nakushikumuka kuze, nakuvasanyika. Ikiye ali nakuzata mulimo wa mwaza. Graham, Billy Graham, ngamba ya Kalunga kuze mukachi ka vikungulwilo, vakamilingu, na vangocho, kuchika echi.

⁷³ Likumbi likwavo omwo vakiki vatondele ikiye apwenga mukulwane walifuchi, ikiye hatomato achikanyine. Kalunga, amukisule hali echi. Mwomwoika, vakiko na jikambanyi jawala,

ikiye kachi numba na kupwa na chikuku kachahashileko. Vakiko kachi venyekenkele ji mbiliyoni jamandola, mwowo ikiye kachi avahakile vakiko kuweluka mukala jila, jize jikambanyi ja makanya na ja ngachize. Talenu, ikiye kulovoka kuze nge muluwa wa Kalunga ku Satome. Mukiko vene.

⁷⁴ Oloze anukenu, kuze kwapwile Umwe atwamine na Apalahama, Lunga mukwavo, keshi vaze vavaliko vayile kuze nge vakakwambulula mujimbu wamwaza wavakakutona vayile kuze na kunangula. Tachikizenu, kuze kwapwile Umwe atwamine kuze. Vavali vayile mujila *ize*, kaha Umwe atwamine *kunona* Apalahama. Kaha Umwe uze atwamine na Apalahama amuhanyinechinjikizo.

⁷⁵ Jino talenu, lijina lyenyi lyapwilenga “Apalama” kaha puwenyi apwilenga “Salai,” likumbi limwe mokomoko avali shimbu kanda haze. Kalunga alisolwele kuli ikiye na kumulweka, “Yami nguli na kwalumuna lijina lyove kufuma mu Apalama na kupwa Apalahama.” (Talenu, G-r-a-h-a-m ali na jisona sikisi, muthu.) Oloze A-p-a-l-a-ha-ma jisona seveni, jisona seveni; h-a-m, kukumisa na h-a-m.

⁷⁶ Jino, kukanduka Muliuka lya mushipilitu, kuze kwapwile Umwe apwile na Apalahama, kaha kutachikiza chize Ikiye kuhanjikile. Ikiye ngwenyi, “Apalahama,” (keshi “Apalama”) “Apalahama, pwevo lyove ali kulihi” (keshi “S-a-l-a-i”) “S-a-l-a? Pwevo lyove Sala ali kulihi?”

⁷⁷ Talenu ovyo ikiye ahanjikile, “Ikiye ali mumbalaka munyima Yove.”

⁷⁸ Kaha Ikiye ngwenyi, “Nanguya nakukutambukila. Yami nanguya nakukutambukila ove.” Talenu uze apwile lyavene, uze Umwe, kutesekesa na lushiko luze Ikiye atungile. Uze apwile Kalunga! Ikiye ngwenyi, “Yami nanguya nakukutambukila.”

⁷⁹ Kaha Sala, (mujila yakulingisa etu vosena kwivwushisa) kumuseha chikuma, muli ivene, ikiye ngwenyi, “Yami, pwevo wakashinakaji, na myaka handulendi yakusemuka, mwata wami” (ou apwile Apalahama) “nakoto nawa, nakulu lyehi kufuma muukweze.” Ngwenyi, “mwomwoika, etu katweshi na chipepa chekako nge omu twapwilenga, Ngwakoto na ikiye nawa.” Kaha ngwenyi, “Etu katweshi kupa nechi ko.” Kaha ngwenyi, “Nachipwa ngachilihi? Echi kacheshi kuhasako!”

⁸⁰ Kaha uze—uze Lunga (Kalunga mumujimba wanyama) ngwenyi, “Mwomwoika Sala nasehela na kukakasana, na kuhanjika vyuma evi?” Muze mumbalaka, kuyima Yenya.

⁸¹ Jino Tala, kachi ou kaweshi mulimo woumwe uze wapwile na Yesu Kulishitu! Ikiye atalile mukachi kaliyongomena kaha atachikijile vishinganyeka vyavo. Ikiye amulwekele Petulu ikiye apwile hiya na lijina lya ise lyapwile lika. Amulwekele Natane.

⁸² Amulwekele uze pwevo ha lishima, uze pwevo ngwenyi. . . Ikiye ngwenyi, “Yako ungumbachileko meya ngunwenga,” mokomoko “Nguneheleko Yami meya ngunwenga.”

⁸³ Pwevo ngwenyi, “Mukulwane, echi kacheshi chisemwa chetuko Ove kuhanjika kuli. . . ove ka Yuleya kuhanjika kuli vaka Samaliya ko. Etu katweshi na chuma chimwe mukachi kaumwe na mukwavoko.”

⁸⁴ Ikiye ngwenyi, “Oloze kachi ove watachikizanga Hiya ove uli nakuhanjika nenyi, ove kachi unangulombo Yami meya akunwa.” Kushimutwila chatwalileho lika. Ikiye ngwenyi, “Yako kambate lunga lyove kaha wizenga kuno.”

Pwevo ngwenyi, “Kangweshi na lungako.”

Ikiye ngwenyi, “Ove unahanjika mwamwaza, mwomwo ove wapwanga navatanu.”

Pwevo ngwenyi, “Mukulwane!”

⁸⁵ Tala ha chihandwa mukachi kachize na vakiko—na vase tupilishitu vali lize likumbi, ize kasulu ili na kuyoyela mu mutelezeji wa likumbi likwavo. Vakiko ngwevo, “Ou ali liyavolo!” Vakiko vatelele kukumbulula chikungulwilo chavo chuma chimwe, ’mwomwo echi chatondewa.

⁸⁶ Oloze ika ou pwevo wamundende wakuhutwa, ize Mbuto yakutongola yapwile mukachi kamuchima wenyi. . . Ikiye apwile na kukola kaha kweseka vize navize, ikiye ayile mujila nge lihule. Oloze omwo ikiye amwene Chize, ikiye ngwenyi, “Mukulwane, Ngwamono nge Ove wapwa uka Polofweto. Etu tunahononga kupwa naumwe mumyaka fwo handulendi, kaha vatulweka nge omwo Meshiya mwakeza nge vyuma Ikiye mwakalinga.” Mamalelo, yami! Ize Mbuto yatwamine muli ikiye yatumbukile nakuyoya! Mwomwoika? Chize kachatondekele kulumbunukako.

⁸⁷ Yesu ngwenyi, “Yami Vene nguli nakuhanjika nayove.” Chize kachatondekele kulumbununako. Ikiye alingile chikomwesa kaha ikiye ambulwile nge Ikiye apwile uze Meshiya, amena, na kupwa na unjiho vene wa Kalunga uze ashikile (“Uze Mwata Kalunga mwakakatula Kapolofweto nge yami,” ngwenyi Mose). Chapwile chuma muka? Kwinjikiza cha Chisoneka!

⁸⁸ Ikiye alahile nakuya mumbongi, kaha ngwenyi, “Twayenu, mumone ou Lunga Uze nangulweke yami vyuma Ngwalinganga. Keshi ikiye vene uze Kulishitu ko? Keshi Ikiye ko? Ikiye nangulweke yami ovyo Ngwalingile.”

⁸⁹ Jino tachikizenu, Yesu, apwile Ikiye vene apwile muli uze Lunga uze atalishile nyima Yenya kumbalaka na kumulweka Sala ovyo apwile nakushinganyeka muze mukachi kambalaka.

⁹⁰ Eli Lizu Iya Kalunga ngwalyo, mu Hepelewu, kapetulu 4, nge. . . Ikiye ahanjikile evi, “Eli Lizu Iya Kalunga lili Iya ngolo chikuma kaha Iya kuvambuka kuhambakana poko

yauvela kuvali, kuvatula nakukwingila namuusongosongo wamuchifuwa, kaha mukakutumbununa vishinganyeka na mukachi ka muchima.” Lyapwa Lizu! Kaha lwola lwosenauze kapolofweto mweza, eji kwizanga na Lizu, kaha ikiye apwile na Lizu lya chize chisemunuino. Kaha lya lingile ika? Mukakupolofweta uze atumbunwine vishinganyeka vize vyapwile mumuchima.

⁹¹ Chazachile muli Yesu Kulishitu mwomwo Ikiye apwile kuzalilila cha Lizu.

⁹² Kaha Yesu ngwenyi, “Nge omu chapwile mumakumbi a Sotome, mukiko na chikapwa naha kwiza cha Mwana muthu.” Ize Shipilitu ya Kalunga nayikeza ha mavu muchifwanyisa cha muthu, Kalunga kusoloka mumujimba wanyama (Amena! Mwamono echi?), kaha yilinga chuma chochimwe chize Kalunga alingile mumujimba wanyama kuze ku Satome. Anuka, vakiko vapwile nakuvandamina mwana walushiko. Kaha, hanyima yachize, uze mwana wa lushiko ejile. Chize chapwile makumishilo achinjikizo chize lizavu lya Satome na Apalahama vamwene shimbu kanda mwana walushiko ezenga. Enu mwachitalisa echi? Kaha jino eli Liuka lya kushipilitu lineza kuli eyi ola.

⁹³ Muthu umwe ngwenyi, “Ndumbu walunga Branham, ove wambanga ngwove ‘uze ikiye Kalunga?’”

⁹⁴ Eyi Mbimbiliya ngwayo, Apwile Kalunga! Echi kacheshi nakutondeka kulumbununako. Ikiye apwa Elohim. Omu mukiko Ikiye Apalahama amuvulukilenga. Kala makakutanga Mbimbiliya atachikiza ngocho. *Elohim*, “uze Umwe akwechi vyosena.” Ikiye apwile uze Wakulivanga, na Kukumisa; Kuputuka, na Kukumisa. Elohim! Apalahama Ikiye amuvulukilenga “Elohim.” Kalunga (mujisona jainene mu chi Hepelewu), Elohim; chochimwe na, “Kukuputuka Kalunga,” Elohim.

⁹⁵ Ikiye apwile Elohim wakusoloka mumujimba wanyama, kuvwala uwalo wauthu, na kulya kulya cha wuthu. Amena! Chinjikizo chize nge mumakumbi amakumishilo nge Kalunga mwakasoloka cheka mukachi kavathu Jenyi mu muthu wanyama! Amena! Yesu ngwenyi, “Milimo eyi Ngweji kulinganga ikiko namukalinga nayenu nawa. Kaha nge muze chapwilenga mumakumbi a Satome, shikaho mukiko na chikapwa naha kwiza cha Mwana muthu.” Amena! Echi kacheshi nakutondeka numba kulumbununako; echi chinatondeka kusoloka, mukiko kaha chinatondeka. Amena. Mwafwelela ngocho?

Echa tunongamenu mitwe yetu.

⁹⁶ Ove Setu wa Mwilu, etu tuli nakukuhana Ove lushiko Lwove ufuku uno Ove wambile vyuma evi. Ove wavashikile vakiko. Kakweshi umwe nahase kulingisa Lizu Lyove kuyoya ko oloze

Ove lyavene. Ove ngwove, “Echa kupwenga Kumunyika,” kaha kuwapwile. Naumwe pimbi nahasa kulumbununa echi, echi chasolokele.

⁹⁷ Nge omu etu twatanganga Isaya, uze kapolofweto, “Pwevo kanda alimone na lunga mwakaya na kwimita,” ikiye emichile; kachatondele kala kusolokako, ikiye emichile. Muze mukiko chasolokele.

⁹⁸ Ove ngwove, omwo Ikiye ejile Ikiye mwakasemukila mu Mbatelema, “Kulovoka mu Mbatelema, Yuleya. Ove kaweshi wakukuminamo hali vamyangana vava Yuta, vamu Isalele? Oloze mukachi kove namukalovoka muka Kuyula va Vathu Jami.”

⁹⁹ Vyuma vize Ikiye mwalinga, muze Ikiye mwalila ha kulusu, omwo Ikiye navakamupayisa, kumutuva hamahunji Eyi na mavoko Eyi; “Ikiye vamulemekele ha milonga yetu yashili, kaha vamujihilile ha upapwoke wetu; kuzangamisa chakutunehela kuunda chapwile hali Ikiye; ha mikiki yenyi etu tunahinduka.”

¹⁰⁰ Omwo Ndvichi ahanjikile, “Kangweshi kuya nakuseza mwono Wenyi muhetese ko, chipwe Yami kwitaviza Umwe Wami Wakujila kumona kupola.” Kaha halikumbi lya muchitatu, shimbu kanda jiola sevete tu jizenga nakuneha kupola mumujimba Wenyi, Lizu lya Kalunga ngwalyo, “Ikiye mwakasanguka.” (Vakiko vahanjikile vakiko vanevi mujimba nakuya nawo; vakiko va chilinakufwelela echi.) Oloze etu twafwelela, Mwata, Lizu Lyove! Lize lya solokele. Yesu Kulishitu asangukile kaha Ikiye ngwenyi, “Nanguya . . . Tala, Yami nguli nayenu lwola lwosena, na kumakumishilo akano kaye.”

¹⁰¹ Etu twafwelela ngana nge Ove uli hano ufuku uno. Etu twafwelela ngana nge Ove uli kaha vene Yesu Kulishitu ufuku uno, hano, nge omu Ove wapwa. Kaha Ove uli kaha nakutalatala meso, mavoko, mahinji, kanwa, myono, mijimba, eyi Ove unahase kulisolola Ove lyavene. Kalunga, tujilike ufuku uno, mangana etu mangana tumone Yesu Kulishitu wakuyoya mukachi ketu. Echa Ikiye ezenga! Kahajino mwaya nakuhita, nge zala yavaze Greeks uze ejile lize likumbi, kaha ngwenyi, “Mukulwane, etu natumumone Yesu.” Kaha vakiko vatela kumumona Ikiye. Mamalelo, kutuva kana chapwile omwo vakiko omuvatalile hali Ikiye!

¹⁰² Kalunga, Ove uli chochimwe lelo. Kaha Ove washikile nge kachi etu tunevu zala etu natukumone Ove. “Handende kaha, kaha kaye kakeshi Kangumonako” (uze mukakuzeneka kufwelela); “oloze enu namukaya Nakungumona, mwomwo Nangukaya nakupwa nayenu, na muli enu, na kumakumishilo akaye.” Etu tunatachikiza nge Ove uli youmwe zau, lelo, na haya myaka.

¹⁰³ Mwata, awa Mazu anahanjika ngwavo, vana wasoneka, jino echa chizachiwe, kuneha Upahu kuli Kalunga, kusolola nge Ikiye alama Lizu Lyenyi. Amena. Kalunga amikisule.

104 Nanguya na kusanyika mukana wakulombelela. Ngwafwelela Billy ngwenyi ikiye ahananga makati akulombelela, wani nakutwala ku handulendi, mokomoko chumachimwe nge ngana. Ikiye keshi hanoko oho lyapwa jino. Ili . . . Kati numbala muka . . . Muthuumwe tala hali hanyima ya yove . . . Echi—echi nachipwa nambala na—na sona (A, B, C, D, mokomoko . . .). Ili ika, A? Chosena chakwoloka.

105 Echa tupwenga na A, nambala wani, tu, seli, fwo, faifi. Putukenu kaha kwimana kaha ngana. A, nambala wani, nambala tu, nambala seli, nambala fwo. Fwo, Kangwayimweneko kwimana. Kati yakulombela nambala fwo. Wani, tu, seli. Kulombela . . . Pamo vakiko kaveshi kuhasa kukatuko. Kachi kaveshi kuhasako, muthu umwe atale ha kati ya owo walihate nenyi, ikiye nahase kupwa na kati kaha ikiye nahono kukatuka. Washi washi jino. Ize kuze, fwo. Faifi, kati nambala faifi. Sikisi, seveni, eyiti, naine, teni, leveni, twolufu. Putukenu kaha kwiza kuno jino shimbu omu vali nakusanyika jinambala jenu. Nambala wani, tu, seli, twayenu kuno kuhichila oku. Kati yakulombela wani, tu, seli, fwo, faifi, sikisi, seveni, eyiti, naine, teni, leveni, imana muchihela chove. Leveni, twolufu, seteni, fwoteni, fifiteni, sikisiteni, seveteni, eyiteni, naiteni, twende, twende wani, twende tu, twende seli, twende fwo, twende faifi. Kuli umwe keshi na . . .

106 Ngwamono mukweze walunga ali mukalikoki kunyima kuze. Kachi nambala yove vanayisanyika, mwana walunga, kaha—kaha kachi kaweshi kuhasako . . . chamwaza, kwata livoko lyove, etu natuya nakumona nge ove uli hano. Talenu?

107 Vangahi vali muno kaveshi na kati ko oloze uli nakuviza? Echa tumone mavoko enu, kwose okwo muli. Hano vene, echi chakwoloka, haka mavoko enu helu. Enu mwafwelela? Shimbu vali nakuvahaka hamwe, enu mwafwelela Echi, nge Ikiye youmwe zau na haya myaka? Vangahi? Talenu ava vakakuzata; kumana Chisoneka kachahajikile lelo, vandumbwami, nge Ikiye apwa Kapilishitu Wakulitulaho uze vanahase kukwata na kwivwa chakukola chetu? Echi chakwoloka? Vangahi vafwelela echi, katulenu mavoko enu? Ikiye Kapilishitu Wakulitulaho uze vanahase kukwata na kwivwa chakukola chetu.

108 Kahajino nge Mbimbiliya ngwayo, “Ikiye youmwe zau na haya myaka,” vangahi vafwelela echi? Kahajino Ikiye mwazata ngachilihi lelo? Ikiye mwazata mwomumwe nge omwo Ikiye azatanga zau. Echi chakwoloka? Ikiye ali kulihi ufuku uno? Natwame kulivoko lya chilyo lya Wakulitulaho, mujimba Wenyi; Shipilitu Wajila ali muno muzuvo, kumulingisa Ikiye kumwijiva.

109 Tachikizenu, jino tala. Chize chasolokele ngachilihi omwo muthu umwe akwachile kuuvwalo Wenyi kunyima kuze, pwevo likumbi limwe? Ikiye kapwile na kati yakulombelela ko,

natwamba ngwetu, oloze ikiye akwachile kuuvwalo Wenyi. Kaha omwo ikiye akwachile kuuvwalo Wenyi, Yesu alumukile kaha ngwenyi, “Hiya nangukwate Yami?”

¹¹⁰ Petulu amutenukilile Ikiye, kaha ngwenyi, “Mwomwoika, Mwata, echi kacheshi na kwivakana kanawako. Mwomwoika, wosena ali nakweseka kukukwata Ove. Mwomwoika nauhanjika, ‘hiya nangukwate Yami?’”

¹¹¹ Ikiye ngwenyi, “Oloze Ngunevu Nguli nakwivwa kuzeya.” Vangahi vatachikiza echi? *Ngolo*, kulumbununa “jingolo,” jafumine muli Ikiye. “Ngunevu kuzeya, muthu umwe nangukwate Yami na kukwata chakuhandunuka.” Kaha Ikiye alumukile na kutala kuliyongomena palanga Ikiye wanyine ize jila ya lufwelelo.

¹¹² Muthu wosena apwile nakuhaka mavoko avo hali Ikiye, “Ove Lapi, etu twakufwelela Ove,” na vyosena ngocho.

¹¹³ Oloze kwapwile muthu umwe punduvene afwelelele Chize. Kaha ikiye akwachile kuuvwalo Wenyi na kufwelela nge ikiye ahindikile, mwomwo ikiye ngwenyi mukachi kamuchima wenyi ahanjikile nge nachiya nakusoloka.

¹¹⁴ Ikiye alumukile na kutala muliyongomena palanga nomu Ikiye amuwanyine, kaha Ikiye ngwenyi... amulwekele ukalu wenyi wamanyinga uneche kaha ikiye ahindikile. Echi chakwoloka? Jino, eyi ikiko jila Ikiye alingile, muliyongomena Iya vathu.

¹¹⁵ Jino, Yami nguli nakuvuluka ngwami Ikiye kafwako, Ikiye ali wamutonyi lelo nge omwo Ikiye apwile. Kaha na Mbimbiliya ngwayo, Yesu ngwenyi, Lyavene, “Nge muze chapwile mumakumbi a Satome, shikaho mukiko nachikapwa na kwiza cha Mwana muthu.”

¹¹⁶ Jino tala, numbatuhu wana wamuyachi wangachilihi ou ali nawo Kalunga hano, kuze kwatela kupwa umwe kuze, nawa, atela kukumbulula kuli chize. Ikiye ayile mumbongi, Mbimbiliya ngwayo, “Kuze kwapwile vyuma vyavivulu Ikiye kahashile kulingako mwomwo yakuzeneka kufwelela.” Echi chakwoloka? Chochimwe na lelo. Ove watela kufwelela Ikiye. Ove watela kufwelela kaha Ikiye. Mukiko kaha ove nauhasa.

¹¹⁷ Kuli Iyehi mukana wakulombelela wakulizanga Iyehi? Jino, wosena apwenga nakuunda munyutu kaha ya teni. Ngwahono kutachikiza nge Nanguhasa kuheta kuze, Ngukwechi kaha twende faifi mokomoko seti vanemana kuze. Oloze jino, mumukana wakulombelela, enu vosena muli mumukana wakulombelela vanatachikiza nge Yami ngungeji kuli enu, kaha Kangwa tachikiza numba chuma chimwe hali enuko, katula livoko Iyove. Wosena mumukana wakulombelela.

¹¹⁸ Jino omwo mulinyongomena, vase vatachikiza nge Kangwatachikiza chuma chimwe hali oveko, katula livoko

lyove. Jino, jino, hano ocho kaha Ngulinakweseka kuhanjika, sepa, talenu. Jino, hano jino. Vosena vakakuzata vazenga kuno kukamenga. Kaha Kulishitu ashikile lushiko elu. Talenu, echi chapwa chakusoneka. Mwaka uka chejile nakuhita? Mumakumbi akumakumishilo, shimbu kanda Kwiza cha Mwata. Echi chili chakwoloka? Echi chapwile nakwiza na kuhita vene.

¹¹⁹ Jino, chize chapwile Lizu vapolofwetele lelo. Keshi kumunyika cha Luther ko; keshi kumunyika cha Wesley; kaha keshi numba kumunyika cha Pendekosita. Echi chinanyi lika mujila jino. Jino, Luther wakwoloka; Mesondisiti ali wakwoloka; Mbaputishiti ali wakwoloka; vosena, Pendekosita, ali kanawa. Kuli kutwama chamuyachi namuyachi chili hano ufuku uno. Echi keshi—echi keshi—echi keshi cha muthu ukawenyi ko. Kachi nge. . .

¹²⁰ Enu kamweshi kuhasa kulweka va Mesondisiti chumachimwe hali Luther, 'mwomwo ikiye afwelela mukujilika oloze Luther mpimbi. Talenu?

¹²¹ Enu kamweshi kulweka va Pendekosita nge “kujilikiwa vya vyosena,” ikiye amwene kutungulula cha mawana. Ikiye keshi kuya na kufwelela echi. Nduma, ikiye akwechi kuhambakana chize. Talenu? Kaha echi lili chisemunuino chaliuka chize etu tukwechi, kaha Mbimbiliya ngwayo kakweshi kuya nakupwa cheka visemunuino vya mauka.

¹²² Oloze kwatela kupwa kukunguluka cha vathu, talenu, kaha hano etu tuli. Jino, Anuka, chinjikizo. Etu vathu vakutaliliza mwana walushiko? Katula livoko lyove. Enu mwafwelela nge enu mwapwa Mbutu ya Apalahama hakupwa muli Kulishitu? Katula livoko lyove. Kahajino, Mbutu ya Apalahama, tambula chinjikizo chove! Echi kacheshi mu Mbaviloni ko. Echi kacheshi muze mukaye muchikungulwilo. Echi chili hano muli enu, vaze kaveshi muli aze majilo ko. Fwelela echi!

¹²³ Hano ou pwevo, ikiye apwile veve ngeji kuli yami, kumwe kujinguluka chisemunuino chochimwe. Kanda lyehi ngumumone ou pwevo muchiyoyelo chami. Kachi Ngunahase kuka ou pwevo Ngunahase kuchilinga, kachi ikiye ali nakuviza. Kangwatachikiza chuma numba chimwe hali ikiye ko. Enu mwamumonanga ikiye kukatula livoko lyenyi mwahichi minyutu yayindende hanyima aha? Kanda—Kanda ngumumone. Ikiye ali kaha pwevo nemana aha.

¹²⁴ Lelo vakiko vejile kuno kaha nanehe mukuta wa makati akulombelela, kuwafutula na kuhana vakiko vathu. Umwe ambachile nambala imwe hano, kaha nambala teni kwiza kuno kunyima, nambala fifiteni, nambala seveni, nambala. . . ngocho kaha. Akiko ali akufutula kaha, kumeso enu, halikumbi halikumbi. Kaha omwo vakiko omu navawasanyika, vakiko vasanyikile osena kufuma kwosena. Talenu? Kaha, jino, enu

kamwatela numba kupwa na kati yakulombela ko, twama kaha okwo na kufwelela. Mwomwoika . . .

125 Limbotole ove lyavene, ufuku uno, wana ola etu tuli nakuyoyela. Talenu? Jino, echi chili hali ha, nawa, sepa. Chili kaha hali!

126 Jino, kachi Kalunga ka Apalahama amusangwile Yesu Kulishitu kumufumisa kuvafu, kaha ou Yesu ashikile echi mumakumbi akumakumishilo vinjikizo vyovimwe vize Apalahama . . . uze kangelo (uze apwile Kalunga mumujimba wanyama) alingile kumeso Apalahama, haze shimbu kanda mwana ezenga, Yesu ngwenyi chuma chochimwe nachikeza na kusoloka lelo.

127 Jino, etu twamono jimbomu na vikungulwilo, na vyosena vize, na majilo aze vakiko valimo. Etu twamono Billy Graham kuze, na Oral Roberts, na vosena vakiko vathu kuze; muluwa va Chipendekosita na muluwa wa chikungulwilo kuze, etu twamono vyosena vilinakusoloka kuya, na vinjikizo. Billy Graham, mukakulinagula vya uthu kaha, ovyo chikungulwilo vafwelela kaha. Oral Roberts, mukakuka kaha, chochimwe vene na Pendekosita kaha . . .

128 Oloze talenu hano, kuli chuma chimwe nawa vashikile kuli Mbuto ya Apalahama. Kuze vakiko vaze vali mukachi ka vikungulwilo; kuli chuma chimwe *muze* mu vikungulwilo vyatelanga kusoloka, kukungulula vathu. Etu natuya nakuviseza palanga hamene ufuku.

129 Tala, Kangwa mutachikiza uze pwevo ko. Nanguya nakutalisa nyima yami kuli ikiye. Kachi Mwata Kalunga mwaya nakuhanjika chuma chimwe kuli uze pwevo, pamo chili—chili cha limbo, pamo chili cha jimbongo, pamo chili cha kuviza; Ngunahono kutachikiza. Ikiye mwaya nakutachikiza nge ou muchano mokomoko nduma.

130 Kachi Ikiye mwaya nakulinga chuma chochimwe ufuku uno chize Ikiye alingile, enu namuya nakumufwelela ou Kalunga ka Yesu Kulishitu nge ashikile kupwa kuno mumakumbi akumakumishilo? Vangahi vafwelela nge etu tuli nakuyoya nge mu Satome, omwo kaye kosena kanayi muchiyoyelo chamu Satome? Vangahi muli enu vanafwelela evi Ngunamilweke enu ufuku uno kupwa muchano? Kahajino, vana na Mbuto ya Apalahama, vafwelela Kalunga!

131 Jino, shikaho echi nachiya nakulovoka mukachi kavishinganyeka vyenu nge Yami nguli nakweseka kuhanjika chuma chimwe kuli ou pwevo, kumutala kumeso, mokomoko kumbata vyuma vyosena nge mukakuvayangila mokomoko kala chuma munatondo kutachikiza. Kala muthu atachikiza mukakuvayangila atela kupwa na mangana amanene kuhambakana echi. Talenu? Talenu? Enu mwamonaho lyehi muthu wakuvayangila kunangula Mujimbu wamwaza? Enu

mwamona lyehi mukavakishi kunangula Mujimbu wamwaza, kulinga vinjikizo na vikomwesa, kuvuluka Yesu Kulishitu mwomumwe? Nduma.

¹³² Talenu, echi chili kaha...vili vishinganyeka vya vathu. Talenu, vakiko vali tupuputa. Enu mwafwelela vakiko vanahase kupwa tupuputa? Eyi Mbimbiliya ngwayo mukiko navakapwa. Echi chakwoloka? “Vakazamuzamu, vakulivwimba, vakuzanga chikuma chiseke kuhambakna kuzanga Kalunga, vakakukana kukonekela vakwavo, vakuvangila vakwavo, vakuzeneka kulilama, vaka kuhunga vyamwenemwene, nakusoloka nge vakwechi kufwana chakalemesa akumeso a Kalunga, oloze ngolo jachonyi vajikana.”

¹³³ Kumana Yesu kahanjikile, muli Mukakujila Mateu 24:24, nge awa mashipilitu avali mumakumbi akumakumishilo nawakaya nakuhungumwisa navaze vene Vakusakula, kachi echi chapwile chachashi? Oloze echi kacheshi chachashiko. Vakiko vapwile mu vishinganyeka vya Kalunga kukuputuka, kaha vakiko vapwa chihanda cha Kalunga.

¹³⁴ Jino, Kalunga ka Apalahama, Yisaka, na Yakova, echa vatachikize ufuku uno nge Nguli nakuvalweka Muchano Wove. Ove Yove, Mwata. Mukulikehesa echa ngamba Yove ahase kufumisa vishinganyeka vyavo mujila, mangana Ove uhase kuzachisa mijimba yetu nakuneha Upahu kuli Ove. Mu Lijina Iya Yesu, ou Mwana Kalunga. Amena.

¹³⁵ Wana chuma muka? Keshi nge chuma chimwe ove mumbata na kuvatula nakwalumuna. Nduma, nduma. Uli kutachikiza mwakulifumishila ove lyavene mujila mangana Kalunga ahase kukuzachisa ove. Wana wapwa kaha kulifumisa ove lyavene mujila, kahajino Kalunga mwakuzachisa ove.

¹³⁶ Ove pwevo wakalemesa uli kunyima yami nauya nakufwa vene kachi kahindikileko. Ou pwevo wakalemesa uli kunyima yami vanamulebelela kuli lunga weka, kalinwaha vene. Ikiye ali na kasa. Eyi kasa ili kulivele na kuvihuyungu vyenyi nawa. Kaha ikiye vanamulebelela lyehi kalinwaha vene, kaha ikiye ali nakweseka kwitavila echi ha lufwelelo nge ikiye nahinduka. Omu MUKIKO MWANAMBE MWATA! Ou muchano, pwevo wakalemesa? [Uze pwevo wakalemesa ngwenyi, “Eyo, pundu vene muchano.”—Muka.] Kachi nge mukiko, hwingisa—hwingisa livoko lyove kulikungumbuwa. Uze Kalunga ka Apalahama hanga ayoya! Chosena chakwoloka, yako nakufwelela ocho wafwelela kaha nauyoya kanawa. Amena.

Enu mwafwelela? Hanjikenu ngwenu, “Nyi likungumbuwa ngwenu ika?”

¹³⁷ Ou pwevo natwame aha ali na...ali kusongo ya mukana, pwevo wakalemesa wamuchivali haze. Omwo Ngwalumukanga na kwalumuka kuze vene Ngwamonanga chuma chimwe, chimwe chuma ha livoko lyenyi, manyinga kuhita chikuma.

Ikiye akwechi manyinga ali nakutambuka washi washi. Echi chakwoloka, pwevo wakalemesa? Katula livoko lyove. Kachi ove unafwelela, kulaha cha manyinga ove nachishikumuka. Uze Kalunga ka Apalahama hanga ali nakulisolola. Ikiye ali vene omwo apwile, lize Lizu lya Kalunga lya lelo!

¹³⁸ Shangwenu mwane? Enu mwafwelela jino? Pwenu na lufwelelo muli Kalunga! Chasoloka nge ali mwana. Kalunga natachikiza muchima wove, kanyike wapwevo, ngwahono kutachikiza. Enu mwafwelela nge Kalunga nahase kusolola kuli yami chuma muka chinahenge? Enu munahase kufwelela Ikiye kachi Nanguhasa? Echi keshi chanyoveko, cha muthu weka, ali ndumwove walunga. Kaha ikiye alinakuviza chikuma, kaha ikiye ali kumbongi ya kukuto kuno, ku Tulare. Kaha ikiye ali muchipatela, kaha ikiye ali na lukeamia, kaha vandotolo vamusuwula afwe. Kakweshi cheka lutalililo ko. Echi chakwoloka. Enu mwafwelela? [Ove pwevo wakalemesa, kulila, ngwenyi, “Eyo.”—Muka.] Chosena chakwoloka. Chuma muka ulanacho mulivoko lyove? Mbata vene ocho nakuchihaka hali ikiye. Kaha kanda kukakasana echi ko. Fwelela! Amen.

¹³⁹ Enu mwafwelela? Kanda lyehi ngumumone ou pwevo wakalemesa muchiyoyelo chami. Oloze Kalunga atwama lika Kalunga! Jino, ngulwekenu yami muthu wanyama nahase kulinga echi? Echi kacheshi chakutunga kuli muthu wanyama kulinga echi ko. Echi chakulinga kuli Kalunga ou Yesu Kulishitu ashikile echi kupwako kumakumbi amakumishilo na kwinjikiza Lyavene (shimbu kanda Mbuto ya Apalahama) nge muze chapwile mumakumbi a Satome.

¹⁴⁰ Jino hano, Kangwamwijiva ou pwevo wakalemesako, etu tulivangeji kuliumwe na mukwavo, Ngwashingtonyeka chinapu kuliwana chetu chatete muchiyoyelo. Ove wafwelela yami kupwa ngamba Yenyi? [Uze pwevo wakalemesa ngwenyi, “Eyo.”—Muka.] Ove wafwelela echi kupwa Lizu? [“Eyo.”] Kaha enu munatachikiza nge echi...Eli Lizu lyapwa lika mukakutumbununa vishinganyeka na kusanda mukachi ka muchima. Echi chakwoloka? [“Echi chakwoloka.”] Eli Lizu apwa Mukakuka, kaha nawa, kachi ove unahase kufwelela Echi. Ove linga ngocho. Ove nauya nakuchisolola, nawa, na muvwimbimbi wilava. Eli kasa. Kaha ove wafwelela nge Kalunga nahase kungulweka yami oho ili kasa? Uli kwishi ya mijingwa, shikaho ndotolo ngwenyi. Ove wafwelela jino nge nauya nakuhinduka? [“Amena.”] Yako, kaha kanda kukakasana ko, kaha Kalunga mwaya na kukulingisa ove kupwa wakulikangula. Amena.

¹⁴¹ Enu mwafwelela, muthu wosena? Chilivene omwo ashikile Ikiye kulinga! Pwenu na lufwelelo muli Kalunga, kanda kukakasanako.

¹⁴² Etu tuvangeji kuli umwe na mukwavo. Kangwakutachikiza oveko. Kachi nge tuli vangeji, echa likungumbuwa vatachikize

echi, etu tuli kwate kumavoko etu. Kanda lyehi ngumumone ou pwevo muchiyoyelo chami.

¹⁴³ Enu okwo mwafwelela? Enu mwafwelela nge ou Yesu Kulishitu? Chuma muka echi? Lili Lizu Lyenyi. Omwo va vathu vakanyine Echi, vakiko kavapwile na kukana uze lungako, vakiko va kanyine Lizu. Eli lili Lizu lize lyapwile kuweluka, kalya hashile kukindulukako nakwingila.

¹⁴⁴ Jino, ou pwevo wakalemesa ali ngeji kuli yami. Kanda lyehi ngumumone ikiye muchiyoyelo chami. Kalunga apwa Mukakuka. Echi chinahase kupwa keshi cha kukako, pamo cha chuma cheka, oloze kachi Kalunga mwaya nakulumbununa kuli yami ukalu wove uka, ove nauya nakungufwelela yami? Chuma chatete ove unatondo kukulombelela, chili, ove ukwechi litwitwi lyalipi. Litwitwi limwe kumatwitwi ove, ove kawevwa nalyoko. Echi chakwoloka. Ukiko muchano. Kaha cheka ove ukwechi chijililo, kaha ove uli nakutonda kufuma kuli echi chijililo, ili kunwa makaya. Haka munwe wove mulitwitwi lyove lilikanawa jino, echi chakwoloka, litwitwi lyove lilikanawa. Echi chakwoloka. Jino fwelela Kalunga kaha yako mujila yove, kaha kanda . . . kaha ove kaweshi kanwa makanya chekako kachi ove muya nakufwelela. Yako, kaha Mwata akukisule ove.

Enu munamono omwo chasolokanga. Kumana Ikiye keshi wamwenemwene ko?

¹⁴⁵ Kangwakwijiva oveko, etu tuli vangeji kuli umwe na mukwavo. Kanda lyehi ngukumone ove muchiyoyelo chami, oloze Kalunga akutachikiza ove. Kachi Kalunga mwahasa kungulweka chuma chimwe hali ove, nauya nakufwelela?

¹⁴⁶ Likungumbuwa lyosena naliya na kufwelela? Kala muthu okwo atachikiza ou pwevo? Kala muthu mu likungumbuwa atachikiza ou pwevo? Chosena chakwoloka, Ove unatachikiza nge ou unapu muchano mokomoko nduma. Echi nachikumisa vyosena. Echi chatela kwambululula muchano.

¹⁴⁷ Jino enu munamono omwo chasolokanga mu minyutu yayindende hanyima. Talenu? Echi chili vene. . . Yami nguli nakupelyangila. Talenu? Chinakusoloka kuli nakwiza milima kuli yami. Talenu, Echi chinapu kutumbununa vishinganyeka. Talenu, Ou ali Shipilitu Wajila. Keshi yamiko. Lili Lizu lya kushika lya lelo. Kanda lyehi lipwengako kufumisa kumakumbi a vapositolo, echi kanda lyehi chipwenga ko. Oloze kuze muze vahanjika, “Shimbu kanda kwiza cha Mwana muthu. Nge muze chapwile mumakumbi a Lote, shikaho mukiko nachikapwa ha kwiza cha Mwana muthu.” Vakakuzeneka kufwelela kavafwelela Echiko. Vakiko kaveshi nakujina kufwelela Echi. Oloze vakakufwelela veji kufwelela Echi!

¹⁴⁸ Jino, kachi ou Shipilitu Wajila mwaya na kusolola echi, vangahi navaya nakufwelela na muchima wove wosena, ove nauya nakuzundula livoko lyove?

149 Ove ukwechi kwenyeka. Ove wapwile na ponde na minyau, kaha yakokele mahunda ashingo yove. Ove ukwechi cheka na jiso jove vajikoka nakujizeyesa. Echi chakwoloka, keshi ngochoko? [Uze pwevo ngwenyi, “Eyo, mwane.”—Muka.] Ove wafwelela? [“Eyo, mwane.”] Ove nauya nakupwa kana. Mwalise Mwata.

150 Ove wafwelela Kalunga mwoka ukalu wakujiso jove? Kahajino yako lika kulutwe kaha tambula kuka chove.

151 Twaya, ove pwevo wakalemesa. Tala kusali eyi. Ove wafwelela Kalunga eji kuka ukalu wa muchima? Chosena chakwoloka, yako mujila yove kaha fwelela, kaha muchima wove nauya nakupwa chakwoloka.

152 Twaya kuno. Ove wafwelela Kalunga nge nahase kuka nyima yove, mwakulingisa ove kupwa kanawa? Yako twalilaho na kufwelela lika.

Fweleleni kaha Kalunga, mukiko kaha ove unahase kulinga!

153 Twaya, pwevo wakalemesa. Ove wafwelela Kalunga nge mwakuka ukalu wamujimo lyove? Yako, lyako kulya chove chachingoloshi, fwelela na muchima wosena.

154 Twaya. Ove wafwelela Kalunga mwoka kutenda muvifuwa? Kahajino yako, fwelela, kaha linga...kaha Kalunga mwaya nakukulingisa ove kupwa kanawa.

155 Chosena chakwoloka, twaya. Ove wafwelela na muchima wove wosena? Ove wafwelela? Kutenda muvifuwa, cheka. Ove wafwelela nge Kalunga nahase kukulingisa kupwa kanawa? Yako lika, fwelela echi, ngwenyi, “Ngwasakwilila, Mwata.”

Vangahi wafwelela okwo? Enu mwafwelela?

156 Ou pwevo wakalemesa natwame aha na vwale ndeleji ichila, katula livoko lyenyi lya chilyo, ali nakuyanda na kulaha cha manyinga. Ove wafwelela Kalunga nahase kukulingisa ove kupwa wakulikangula? Ove walingi? Chosena chakwoloka. Haka livoko lyove hali owo pwevo wakalemesa nalihate na ove natwame okwo, kaha mulweke ikiye ikiye nge lizu lyenyi naliya nakupwa kanawa. Amena.

Chize haze. Amena. Ove wafwelela? Pwako na lufwelelo!

157 Hano hali lunga natwame aha, ali na mikila. Ove unafwelela, mukulwane, ove unatwame aha? Eyo, ove uli na mukila. Ove wafwelela nge nauya nakuyoya?

158 Pwevo wakalemesa nalihate na ove ali na mikila naikiye nawa, kaha ikiye ali naukalu wanyima. Ove unafwelela nge Kalunga mwaya na kukuka? Wafwelela? Katula livoko lyove na nakuchitavila. Fwelela.

159 Ou pwevo wakalemesa nalihate na ove ali naukalu na mahinji eyi na mutungi. Ove wafwelela nge echi chili chakwoloka, pwevo wakalemesa? Ove wafwelela nge nauya

na kuhinduka? Chamwaza, katula livoko lyove, hanjika, “Ngunetavila echi.”

¹⁶⁰ Chosena chakwoloka, owo pwevo wakalemesa nalihate nenyi ali namusongo. Ove wafwelela nge Kalunga mwoka owo musongo, mukweze wapwevo wakalemesa unavwale vivajilo? Katula livoko lyove, hanjika, “Ngunetavila echi.” Chosena chakwoloka, fwelela echi.

¹⁶¹ Pwevo wakalemesa nalihate na ikiye ali naukalu wa jiso. Ove wafwelela Kalunga nge mwaya na kuka ukalu wa jiso, pwevo wakalemesa? Chosena chakwoloka, katula livoko lyove, chitavile echi.

¹⁶² Kanyike wapwevo nalihate na ikiye ali na ndanda. Ove wafwelela nge Kalunga mwoka oyo ndanda? Katula livoko lyove, chitavile echi.

¹⁶³ Vangahi vanafwelela namuchima wove wosena? Kahjino imana hamahinji ove na kwitavila echi. Katuka muno kumeso a Kalunga ka Apalahama, Yisaka, na kaYakova.

¹⁶⁴ Mu Lijina Iya Mwata Yesu Kulishitu echa Shipilitu Wajila aholokele muno muzuvo hano vene na kuka muthu wosena ali Kumeso a Ukalunga!



KALUNGA IKIYE MUKA KULILUMBUNUNA IVENE LVE64-0205

(God Is His Own Interpreter)

Ou Mujimbu kufuma kuli Ndumbu wa lunga William Marrion Branham, vawambulwile hakuputuka mu Ingilishi ha Chitatu na chingoloshi, Kutatu 5, 1964, ku Kern County Fairgrounds Bakersfield, California, U.S.A., vanaufumisa mu muzu vakopele ha tepu na kuusoneka mu Ingilishi chakuzeneka kuwalumuna. Echi kwalumuna Lilimi vachinungulwile vausonekele na kuupangila kuli vaka Kukopa cha Lizu Lya Kalunga.

LUVALE

©2020 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Tachikizenu lisesa lyakufwatula

Kulama lisesa lya kufwatula. Ou mukanda vanahase kuufwatula kumakina akuvulisa a hembo kupwa wakuzachisa kuli muthu hakapanji kenya mokomoko kuhana kweka, wa wana wakanyombo, kupwa chitwa chakutanjisa Mujimbu wamwaza wa Yesu Kulishitu. Ou mukanda kavatela kuulanjisako, chipwe kuyitunga yayivulu chikuma, chipwe kuyihaka ha peho ha website, kuyitulika muze vanahase kuyifumisa, kulumbununa mu malimi eka, mokomoko kuuzachisa kupwa jila yakutambwilamo mali chakuzeneka lisesa lya kusoneka kufuma kuli vaka Voice Of God Recordings®.

Mwatondo kutachikiza vyavivulu mokomoko vyuma vikwavo, kaha sonekelenu ku:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org